

www.BibleForChildren.org

San Mateo 26




Xxupa ubisa
atti lanila isia
laní Pascuaha,
ugía Jesús-ni lhe'esi
Betania ata do Lázaro
benne belhidha benbie lo
elhuttiha. María-ni nna
bedaxxue ttiba medi litru
seti rure ixixxi. Setiha
ankana taga'a ge ttu iyya to tee
láni nardo. Setiha raka xxattana
yaxi nna utabi María-ni nuha ka ni'a
Jesús-ni. Nianna tti bodibisie ka ni'eha
len itsa ikieha. Itúba lhe'e yo'oha ure tsi'i setiha.




Judas Iscariote, ttu ka benne tsi'inu rudhetini Jesús-ni (12), ugíana gwanne lenna ka nu lóni ge ka bixxudiha kini utena Jesús-ni lasi nákani.


Lakana nna bedeakabakinna ge nu rana kanaha, nianna bisia ro'okani ugwekana na belhiu. Lana nna udulo ttebana begila leni ki gaxasina utena Jesús-ni lasi nákani.



Aníha uka nna ka benne
rudhetinieha benbake atti tteba
raba Jesús-ni, ugíabake gwenke
irse ge laní Pascuaha. Laka yu'uke
gotha nna tti bedaxxu Jesús-ni
yettaxtilaha nna begwebie Tata Do
Yebáha ixkixaru. Nianna tti ulha'abie
lhe'e benneha nna begwebie ka benne
rudhetinieha nna ree
ke: –Gwaludaxxu
nna gwaligo.
Benne-ni anke
bela latia.



Iki de nuha nna tti bedaxxue xiga
ta'a vinuha nna begwebie ixkixaru
Tata Do Yebáha, nianna tti
begwebie ka benneha nna ree ke:
–Gwali'iya iyále nuní, kumu nuní
ankana reni kia. Reni kia-ni rugwena
lidhaka tisa chi bodha'an Tata Do
Yebáha len ka benne. Reni-ni ilalina
kini ixé ka benne ixú elha
xen lasi ge ka
tulha ruinke.



Jesús benne anke Xxanari'iha rágabe Simón-ni:
–Simón, nu xxegwiha chi unnabana len neti kini
ugwelhaa na udekina ikile ttiba ttu xuxtila. Ttaka neti
nna chi unnabaa len Tata kiahá gelu kini abittu udhanlu
tsia lelu neti. Lu nna ganna chi eyekilu odaxxulu neda
kiahá, la'ania nna lu nuná ebeki tsitsilu le ka betsi
to gelu-ni kini ese'e
tsitsike lo neda kia.




Simón-ni nna rane: –Neti gwadúbaa lenlu xa tata,
meskila tsia lania lu lisiyya, lhe o meskila gattia len
kwinalu lhe. Jesús-ni nna bekabie geni, ree: –Pedro,
neti ria lu, nnolha, tti lanila kwesi chinkaha, lu tsunna
libela chi bedhea lelu a ridí ro'olu deki ankabienlu neti.



Nianna tti dia Jesús-ni len
ka benne rudhetinieha ttu
latti ata tee láni
Getsemaní, nianna ree
ke: –Nii gwaltse'e, laka
neti tsiaya innea len Tata
Do Yebáha. Nianna
ree: –Tata to kia, nu diru
innálu, benchi kini abittu
uyúa elha disa-ni, kumu lu
gwakaba gelu uinlu iyá. Ttaka
labí nu innía aka, sinuki nu
innába kwinalu aka.



Aníha uka nna bisin len Judas-ni ka soldadu lhe ka nu rise'e gweyú ro'o yotuha lhe. Ka nuha udhelha ka nu loni ge ka bixxudiha kana lhe udhelha ka fariseo-ni kana. Diakana denkana espada lhe yaga lhe dengabakana ka lámpara lhe ya nalha gi lhe. Nianna ttu ka benneha benie gwe nubiyú riben lo sina ge bixxudi xeniha, uchúe naga ben geni. Ttaka Jesús-ni nna rabie: –Chinka, ttanába. Nianna tti utane naga nubiyúha nna beyonie nagani.



Nianna tti bedaxxukana Jesús-ni nna dechekane lisi
bixxudi xeniha. Pedro-ni nna idittuliba danalhana.
Nianna tti bekuakana gi lali'a ge yo'oha nna
use'ekana abi'iba kwe'e
nuha. Niha-gaba
beteche Pedro-ni
lagwi gekani.



Ttu ka nu riben sina ge
bixxudi xeniha, delába
ttu nu datiana nu uchú
Pedro-ni nagoniha,
nuha rana na: –¿Laaba
ata daa ka ya olivuha-ba
biláti lu, du lenlu nubiyú-na?
Pedro-ni nna labí bededí ro'oni
attu libe. Looraha tteba nna
uresi chinkaha. Nianna beria
tteba Pedro-ni ro'o yo'oha nna
uresibana ttibaxkaba leni de releninna.




Nianna iyábakana bedú liikana nna
uchekana Jesús-ni gwatso dúkane
arlo Pilato-ni. Nianna unnaba tisa
Pilato-nie, rane: –¿Si lu ankalu nu
rinnabia ge ka nu Israel-ni? Lee nna
bekabie geni, ree:


–Luba chi ra deki nuná
ankaa xa. Pilato-ni nna de
raka leni odilána Jesús-ni,
aníoka nna belisana kana

attu libe. Ttaka lakana nna
adíla idisa uresi'akana, rákana:


–¡ Betá nuná lo ya kurusi!
¡Betá nuná lo ya kurusi!




Aníha uka nna bote Pilato-nie lasi
nákani kini utákane lo ya kurusi.
Lakana nna dechekana Jesús-ni.
Jesús-ni nna nuje kurusi geeha birie
die ttu latti ata tee láni Gólgota len tisa
hebreo. (“Gólgota” dienna innána
bega iki nu yatti.)



Niha betákane lo ya kurusiha.
Betágabakana a chupa ka nubiyú lo ka
ya kurusi, ttu ttukana utákana
daka lhitte, labie nna
betákane lagwi
ge ka nuha.



Tatubisa-na bechulhaba lobie nna lari daa lagwi lhe'e
yotuha nna chubaa tíba bireda nuha. Jesús-ni nna
unnebie idisa, rabie: –Tattoo, lasi nálu otea elha nabani
kia-ni. Nuha-ba rabie nna tti uttie.



Tti chi ulha sá viarna, la sáha nuha chi
rese'e tse ka benne Israel-ni ki
udaxxuke sá reyaka lekeha,
la'ania nna ugía José benne
lhe'esi Arimatea, benneha
labí usinie gwatte'e lo
Pilato-ni kini rennabe
echide Jesús-ni lo
ya kurusiha.




José-ni anke ttu ka nu resá lagwi ge
ka nu runi elhuxtisi ge ka benne
Israel-ni lhe anágaba dogabe
ribede isia sá innabia Tata
Do Yebáha. José-ni nna
uyo'ona ttu lari sibi
nna tti bechidana
Jesús-ni nna
bottesine lhe'e
lariha,


nianna gwakatsine lhe'e
ttu baa uche'enna lhe'e
ttu íyya daa niha. Nianna
tti bottulhuna ttu íyya
nna gwadheana ro'o
yieru baaha.



Beyeki sáha, la sá tti reyaka le ka
benne Israel-ni, ka nu loni
ge ka bixxudiha lhe ka
fariseo-ni lhe bisinkana
lo Pilato-nirákana na:
–Tata xisi to, ri'itu
rexxa letu ge nu ruin
leniha tti sa anka
bennaha, rana: . . .



... “Ganna chi uka tsunna ubisa
uttiaha, iki de nuha nna eyaka
benbaa attu libe.” Aníha
uka nna diakana gwadhea
tsitsikana íyya nu yaya
ro'o yieru baaha nna
bese'ekana ka
soldaduha ki uyú
tsitsikana ro'o
nuha.




Iki de chi ute sá tti reyaka le ka benne
Israel-ni, tti chi ugwani dila bedú
ni'a xumanuha, dia María
Magdalena-ni lenie attu
María-ni diake
gwalannike ro'o
yieru baaha.



Ttiruba ttu nnelaba bixú idí kumu ttu
anjeli ge Tata Xisiha ugwadie dabie
yebáha. Bisie nna ubige ro'o
yieru baaha nna utue íyya
yaya ro'o nuha nna tti
udoe ikini. Ka soldadu
ka nu se'e ruyúkana
ro'o yieru baaha,
rixidinibakana de

usikinna ge anjeliha,
nna tuttíruba
bechulhakinna
ttiba ttu nu yatti
ukakana.





Anjeliha nna unnebie, rabie ka benne
nuilaha: –Bittu gasinle, kumu neti
gwayúbaa deki lebi'i regilale
Jesús ge Nazaret benne
betákana lo ya kurusiha.
Lanúru benneha tee
nii kumu chiba
beyaka ben
benneha atti tteba
chi
reeha.

Gwaltáruga
gwalugía ata
utixxakaneha.



Aníha-ba uka nna jeru tteba deyya ka
benne nuilaha beru'unake ro'o yieru
baaha, rasibakanie lhe
redeakabakanie deyyake
gwattixxi'akanie ka benne
bedhetinieha.



Ttiru nna ttu nnelaba uka xxe Jesús-ni arlo
ka benne nuilaha nna begwebie ke
padiuxi. Lake nna ubiga ttebake
gwatesike lhe'e ka ni'eha
nna bedú xibike arloe.





Iki deliba nuha nna tti bele'e lo Jesús-ni len ka benne sineaha tti yu'uke go yettaha. Utise ke kumu de ttu tsaba labí ridielhake tsia leke ge ka benne chi bilákanie bie deki beyaka banie. Iki de unne Jesús benne anke Xxanari'iha len ka benne sinea bedhetinieha, nianna tti beyapie deyye yebáha nna besine udoe daka ná ben ge Tata Do Yebáha.



'Kumu de yalhá ukani Tata Do Yebáha ge
ka benne se'e yiesi lo yu-ni, de nuha nna
udhelhe neti benne ankaa Xi'in ttu túbiru
geeha, kini anáchu iyába ka benne
tsia leke neti nna abittu tsia
nnittike, sinuki satíaba
aka benke arloe.



Romanos 3:23

kumu iyábari'i ruinri'i tulha, de nuha nna labí ralhari'i edí
baari'i xiani ge Tata Do Yebáha.

Romanos 6:23

Kumu tulha ruinri'i-na, elhuttiba rigila nuná geri'i. Ttaka
Tata Do Yebáha runie kini aka ben ri'i ttu dia lii arloe de chi
babari'i len Jesucristu benne anke Xxanari'iha. Nuní nu tse
redá lebie kwentaba rutebie geri'i.

Hebreos 9:27

Anágaba, attigabari'i ka benne se'eri'i yiesi lo yu-ni, chiba
ga'anna deki suna ttu libeba gattiri'i nna iki de nuha nna tti
uin Tata Do Yebáha elhuxtisi geri'i,



Efesios 2:8,9

Kumu lebi'i, de bedába le Tata Do Yebáha nna gwa bodilábie le. Bodilábie le de ugía lele gebie, laa kwinaga lebi'i benle ttu bixa ki lhaale. ¡Ko'o! Tata Do Yebáha kwentaba bodilábie le. Laa de ruingari'i bixa ttu nu tse nna rodilábie ri'i. ¡Ko'o! Sinuki de redába lebie nna rodilábie ri'i. Aníha kini abittu tse'eri'i innári'i deki de ruin tsebari'i nna gwa rodilábie ri'i.

Romanos 10:9,10

Kumu ganna lu innelu innálu deki Jesús-ni anke Xxanalu Ihe ganna itú iki itú lelu tsia lelu deki Tata Do Yebáha belhidha benbie benneha lo elhuttiha, la'ania nna godilábe lu. Kumu len lastori'i tsia leri'e kini abitturu yua ujari'i ge nu ruinri'i nna len ro'ori'i nna kixxi'ari'i deki ria leri'i benneha. Aníha uinri'i kini odilábie ri'i.



San Juan 3:16,17

'Kumu de yalhá ukani Tata Do Yebáha ge ka benne se'e yiesi lo yu-ni, de nuha nna udhelhe neti benne ankaa Xi'in ttu túbiru geeha, kini anáchu iyába ka benne tsia leke neti nna abittu tsia nnittike, sinuki satíaba aka benke arloe. Kumu Tata Do Yebáha laa udhelhage neti benne ankaa Xi'inie, laa udhelhage neti yiesi lo yu-ni kini ukinnia ka benne, sinuki udhelhalee neti kini odiláya ke.

1 San Juan 5:11-13

Tisa-ni nuní utixxi'e, delába utixxi'e unie ki aka benri'i ttu dia lii nna elha nabani gatta geri'iha, Xi'inieha-ba utebie nuha geri'i. Ganna ri'i du lenri'i Xi'in Tata Do Yebáha, la'ania nna gwa teeba elha nabani geri'i ttu dia lii nna ganna ri'i abíba du lenri'i Xi'in Tata Do Yebáha, la'ania nna labí gatta elha nabani geri'i ttu dia lii. Iyá nuní benia lo yetsi-ni nna ridhelhaa na gele, lebi'i ka benne chi ria lele ge Xi'in Tata Do Yebáha, kini anáchu nna yule deki gwa tee elha nabani gele ttu dia lii.



San Mateo 26-28; San Lucas 22-24;
San Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Zapotec Yareni NT (zae) © 2014, Wycliffe Bible
Translators, Inc. All rights reserved.

<https://www.bible.com/bible/1353/MAT.1>

©2026 Bible for Children, Inc.

www.M1914.org

www.bibleforchildren.org

